

四庫全書

史部

欽定四庫全書

史部

欽定續通志卷五百十三

侍講學士臣羅國俊覆勘

總校官原任侍講臣王燕緒

欽定四庫全書

欽定續通志卷五百十五

忠義傳

宋二

傅察

李翼

李聳
閭城

王唐臣
折可與
劉子英

張忠輔

孫益

孫容

史抗

稽古
稽哲

蔣興祖

張確

李震

李涓

黃友

王士言

祝公明

劉士英

王稟方

李邈

劉翊

張克戩

阮駿

姜綬

陳邁

適

霍安國

林淵張聲趙士諒張謙
于潛沈敦張行中

歐陽珣

劉軫

徐揆

李若水

吳革

滕茂實

趙士跋

傅察字公晦孟州濟源人
中書侍郎堯俞從孫也年十

八登進士第
蔡京在相位欲妻以女拒弗答累官吏部

員外郎宣和七年接伴金國賀正旦使將及燕聞金人
來侵或勸毋遽行察曰受使以出聞難而止若君命何
遂行抵境上金人擁之東北去遇斡里雅布領兵至驛
導使拜察曰吾奉使大國見國主當致敬今來迎客而
脅我至此又止見太子太子雖貴亦人臣也當以賓禮
見何用拜為斡里雅布怒曰吾興師南向何使之稱凡
汝國得失為我道之否則死察曰主上仁聖與大國講
好信使往來項背相望未有失德太子干盟而動意欲

何為還朝當具奏幹里雅布曰爾尚欲還朝邪左右促使拜白刃如林或捽之伏地衣袂顛倒愈植立不顧反覆論辨幹里雅布曰爾今不拜後日雖欲拜可得邪麾令去察知不免謂官屬侯彥等曰我死必矣爾等若萬一得脫幸記吾言告吾親使知我死國少紓其無窮之悲也衆皆泣既次燕山強之不屈遂見殺副使蔣瑩及彥輩歸道察不屈狀贈徽猷閣待制後謚忠肅

李翼麟州新秦人宣和末為代州西路都巡檢使屯崞

縣金人取代遣來諭降翼射却之帥士卒守城義勝軍
統領崔忠殺都監張洪輔夜引金兵入城翼挺身搏戰
達旦被執尼堪欲臣之罵不屈與縣令李聳丞王唐臣
尉劉子英監酒閭城將官折可與同死之

張忠輔宣和末為將同崔中

按崔忠殺張洪輔事見李翼傳攷徐夢莘三朝北盟

會編及李翼行狀所載並同本傳訛洪作忠訛忠作中均誤

折可與守崞縣金人來

攻中有二心忠輔宣言于衆曰必欲降請先殺我中設
伏給與議事斬忠輔首擲碑外建炎中官可與子五人

而忠輔不與士論惜之

孫益不知其所以進宣和末以福州觀察使知朔寧府
被命救太原時敵勢張甚或言不若引兵北擣雲中彼
之將士室家在焉所謂攻其所必救也益曰此策固善
奈違君命因躍馬冒圍至城下張孝純不肯啓門遂死
之按封有功編年載孫翊為金人所殺事與傳同張滙
金國節要載孫翊為麾下所害事與傳異而皆作孫
翊本傳作初益在朔寧察郡人孫谷可用奏為掾屬益
益恐誤出師屬以後事益死敵騎來攻衆議欲開關迎之谷爭

弗得嘆曰吾身已許國且不忍負孫公之託也或舉刃脅之無懼容遂見殺

史抗濟源人宣和末為代州沿邊安撫副使金人圍代急抗夜呼其二子稽古稽哲謂曰吾昔語用事者擇帥增戍雁門以謀未形之患言不吾省今重圍既固外援不至吾用六壬術占之明日城必陷吾將死事汝輩能聽吾言當令家屬自裁然後同赴義二子泣曰唯父命明日城果破父子三人突圍力戰死于城隅

蔣興祖常州宜興人之奇之孫也以廕累調饒州司錄
遷知開封府武陽縣治為畿邑最靖康初金兵逼京師
道過縣或勸使走避興祖曰吾當死于是與妻子留不
去監兵與賊通斬以徇金數百騎來攻不克明日師益
至死焉妻及長子相繼死詔贈朝散大夫

張確字子固邠州宜祿人元祐中擢進士第徽宗即位
應詔上書列上籍宣和二年召至京師青溪盜起確言
此皆王民但庸人擾之耳願下哀痛之詔省不急之務

敢以花石淫巧供上者死撫綏脅附毋以多殺為功決
旬之間可以殄滅忤王黼意通判杭州攝睦州事以方
略告諸將用其言盜平徙知坊汾解三州七年又徙隆
德府金兵圍太原確表言河東天下根本安危所係若
得秦兵十萬人猶足以抗敵不然惟有一死報陛下耳
書累上不報明年二月金兵至確乘城拒守或獻謀自
東城潰圍出確怒叱曰確守土臣頭可斷步不可移也
乃戰而死事聞贈述古殿直學士

李震汴人也靖康初金人逼京師震時為小校率所部三百人出戰殺人馬七百餘已而被執金人曰南朝皇帝安在震曰我官家非爾所當問金人怒而鬻割之膚肉盡猶罵不絕口

李涓字浩然駙馬都尉遵勗曾孫也以廕為殿直召試中書易文階至通直郎知鄂州崇陽縣靖康元年京城被圍羽檄召天下兵涓以所募六百銳然請行而募士多市人不能軍涓出家錢買牛酒激犒之即日引而東

比過淮蒲圻嘉魚二縣之兵始至合而前至蔡敵游騎已集涓馳馬先犯其鋒步卒蒙盾徑進頗殺其騎且走涓棄勝追北十餘里與敵遇飛矢蝟集二縣兵亟舍去涓創甚猶血戰大呼叱左右負已遂死馬朝廷錄其忠贈朝奉郎官其三子

黃友字龍友溫州平陽人登進士第調永嘉瑞安二縣主簿方臘竊發友同諸將所至收復婺寇復作守留友攝兵曹為殄滅計友請往諭之既次浦江賊望風解去

復單騎次武義賊衆持釘一槥置其前友正色叱之曰
汝等何速死邪賊首李德壯之亟麾退一境貼然通判
澶州金人敗盟郭藥師以常勝軍叛燕山響應友獨出
戰躬犯矢石裂脣落齒欽宗初制置使詹度言友久服
武事籌略過人丞相何鼎更薦之召對問視友脣齒破
裂狀為之稱歎賚予甚渥進直徽猷閣制置司參謀官
同神師中解太原圍友遣兵三千奪榆次得糧萬餘斛
明日大軍進榆次十里而止友亟白師中此地三面受

敵不利軍不聽友仰天嘆曰事去矣迨曉兵果四合益以鐵騎士卒奔潰敵執友謂曰降乎友厲聲曰男兒死耳遂遇害帝書忠節傳家四字旌其閭官其後八人王士言武舉進士累立戰功宣和初擢河東燕訪使方臘為寇馮熙載薦為東南第三將首解嘉興之圍靖康元年詔以浙西兵往河東防秋金人攻澤州畢力扞禦他將守城西南隅者陷士言巷戰而死贈拱衛大夫忠州圍練使官其後五人

祝公明處州麗水人太原府孟縣主簿靖康間金人逼河東令棄官去公明攝縣事圍守踰年城陷不屈子陶為唐州司戶中原失守陶亦死官所建炎中贈公明承事郎

劉士英宣和間為温州教授方臘陷處州州人爭具舟欲遁士英獨奮身任責推諸生石礪為謀主分其地為八隅以鐘為約令民聞鐘聲則趨所守堞未幾賊來攻拒守凡四十餘日官軍既至賊潰去靖康初通判太原

府金人入境師臣張孝純欲避之士英率通判方笈將

官王稟力止孝純及城陷稟赴火死士英持短兵接戰

死之笈在金因諧和使附書言二人死節

按欽宗紀載金人克太原

副總管王稟通判王笈皆死之是笈乃與稟同時死節與本傳所載互異

後刻石于溫衢二

州

李邈字彥思臨江軍清江人以父任為太廟齋郎初調

安州司理用薦改京官擢通判河間府以迂蔡京童貫

換右列由承議郎換莊宅副使知霸州為遼國賀正副

使還貫將連金人夾攻契丹呼邈至私第使附已邈不從上書言契丹不可滅都轉運使沈積中摺邈罪五十有三條鞠治一無所得乃以建神霄宮不如詔免官貫收復燕山奏邈知涿州改易州皆辭不赴嘆曰國家禍亂自茲始矣金人逼京師詔趣入見邈慨然就道既至會姚平仲戰不利京師震動帝問禦敵奈何邈言勝負兵家之常第古未有和戰不定而能成功者請以諸道兵畀种師道視敵為進退時耿南仲方主和議不合金

人猶駐毛駝崗乃以邈為京城西壁守禦使邈言姚平仲敗績而敵猶不敢留是畏我也不以种師道再戰已失機會尚可尾其行及河半渡擊之議復格三上章致仕不允及金兵再至猝令守真定邈諭民出財共為死守又募民為勇敢數千人而新集之兵皆無鬪志間道走蠟書上聞不報被圍四旬城破邈巷戰不克將赴井左右持之不得入執見韓里雅布魯之拜不拜以火燎其鬚眉及兩髀亦不顧乃拘于燕山府久之欲以邈知

滄州笑而不答且說之曰天下強弱之勢何常汝不以此時歸二帝及兩河地歲取重幣如契丹以為長利強尚可恃乎金人聽其言復命之降終不屈憤詆甚力至搥其口猶吮血嘆之遂遇害高宗時贈招化軍節度使

諡忠壯當邈之守真定也府路都鈐轄劉翊

三朝北盟會編作劉

翊

率衆晝夜同心力拒城陷猶集左右巷戰已而其下

稍亡去翊挺身潰圍不得出乃之孫氏山亭中自縊死張克戢字德祥侍中耆曾孫也第進士累官衛尉丞初

克戩從弟克公為御史劾蔡京京再輔政修怨于張氏
以微事黜克戩踰年起知祥符縣宣和七年八月知汾
州十二月金兵逼河東圍太原太原距汾二百里遣將
寧珠貝勒來攻縱兵四掠克戩畢力扞禦數選勁卒撓
敵營出不意焚其柵敵遂引去論功加直祕閣靖康元
年進直龍圖閣右文殿修撰太原不守克戩下令兵民
曰太原既陷吾固知亡矣願與此城終始以明吾節諸
君其自為謀皆泣不能仰視同辭而對曰公父母也願

盡死聽命乃益厲兵戢守身帥將士擐甲登陴雖屢却敵而援師訖不至十月朔金益萬騎來攻愈急克戢度不得免手草遺表及與妻子遺書緹州兵持抵京師明日金兵從西北隅入殺都監賈亶克戢猶帥衆巷戰不利歸索朝服南向再拜自引決一家死者八人事聞詔贈延康殿學士紹興中謚忠確

阮駿興化軍人紹聖元年進士為河南府少尹金人入京師率所隸兵擁護神御殿抱神御死特贈朝議大夫

姜綬處州麗水人金人再圍京師朝廷募忠勇士齎蠟書往南京總管司調兵赴援綬以忠翊郎應募刳股藏書縫下南壁為邏騎所獲厲聲叱罵遂被害建炎中官其子特立承信郎

陳邁字亨伯其先自江寧徙永州邁登進士第累官廣西轉運判官忤蔡京罷歸起知商州興元府入為駕部金部員外郎累遷給事中請外以直祕閣為河北轉運使加直龍圖閣徙淮南帝將易置發運使命選諸道計

臣有閱閱者執政以邁言蔡京曰職卑不可帝曰可除
集英殿修撰使往京乃不敢言遂為副使未幾升為使
時運渠壅澀邁使決呂城陳公兩塘達于渠漕路甫通
而朱勔花石綱塞道邁捕繫其人而上章自劾帝為黥
勔入進邁徽猷閣待制宣和二年冬方臘亂詔以屬邁
加龍圖閣直學士經制七路治於杭時縣官用度百出
邁創議度公私出納量增其贏號經制錢其後總制使
翁彥國倣其式號總制錢于是天下有經總制錢名自

兩人始也又言妖賊陵暴州縣搜求官吏備極慘毒益貪汙嗜利之人倚法侵牟騷動不知藝極不平之氣結于民心一旦乘勢如此臣願采撫官吏姦賊尚仍舊習者按治以聞乞重寘于理許之杭經巨寇後河渠堙窒水潦為病邁以冬月治河不兩月畢杭人利焉徙河北都轉運使進延康殿學士厯知中山真定河間府欽宗立加資政殿學士厯官至光祿大夫復徙中山金人再至邁冒圍入城堅壁拒守詔康王領天下大元帥命邁

為兵馬元師受圍半年外無援師京都既陷割兩河求和邁弟光祿卿適至中山臨城諭旨邁遙語之曰主辱臣死吾兄弟平居以名義自處寧當賣國家為囚俘乎適泣曰兄但盡力勿以弟為念邁呼總管使盡括城中兵出戰總管辭遂斬以徇又呼步將沙振徃振素有勇名亦辭邁固遣之振怒且懼哀刃入府害邁于堂及其子錫并僕妾十七人長子鉅以官淮南獲免振出帳下卒譟而前曰大敵臨城汝安得殺吾父執而摔裂之身

首無餘城中無主將乃開門出降金人入見其屍曰南
朝忠臣也歛而葬諸鐵柱寺建炎初贈特進適由開封
少尹衛尉少卿至光祿卿是役也金人執之以北後十
年死于雲中

霍安國不詳其家世靖康元年以右文集英殿修撰知
懷州金騎再至被圍安國與鼎澧兵共守扞禦不遺力
拜徽猷閣待制城陷將官王美投濠死尼堪引安國以
下分為四行問不降者為誰安國曰守臣安國也問餘

人通判州事直徽猷閣林淵兵馬鈐轄濟州防禦使張

彭年都監趙士訥

范仲熊北
記作士擣

張謐于潛鼎澧將沈敦張

行中及隊將五人同辭對曰淵等與知州一體皆不肯
降乃解衣面縛殺十三人而釋其餘安國一門無噍類
明年贈延康殿學士

歐陽珣字全美吉州廬陵人崇寧五年進士累官將作
監丞金人逼京師朝議割河北絳磁深三鎮地講和珣
率其友九人上書極言不可及事急會議珣復抗論當

力戰戰敗而失地他日取之直不戰而割地他日取之
曲時宰怒欲殺珣廼遣珣奉使割深州珣至深州城下
慟哭謂城上人曰朝廷為姦人所誤至此吾已辨一死
來矣汝等宜勉為忠義報國金人怒執送燕焚死之

劉鞏字仲偃建州崇安人第進士累官陝西轉運使劉
法死夏人攻震武鞏攝帥廊延出奇兵擣之解其圍夏
人來言願納款謝罪皆以為詐鞏曰兵興累年中國尚
不支况小邦乎此情實也密疏以聞詔許之西邊自是

遂安幹求東歸拜徽猷閣待制提舉崇福宮起知越州
方臘陷衢婺越大震官吏悉遁或具舟請行幹曰吾為
郡守當與城存亡不為動益厲戰守備寇至城下擊敗
之拜述古殿直學士召為河北河東宣撫參謀官時邊
臣言燕民思內附童貫蔡攸方出師而种師道之軍潰
幹意邊報不實即馳白貫攸請班師又論燕薊不可得
正使得之屯兵遣餉經費無藝必重困中國還次莫州
會郭藥師以涿州降戎車再駕以幹議異徙知真定府

藥師入朝韜密奏乞留之不報徙知建州改福州加延
康殿學士或言其過闕時見御史中丞有所請遂罷起
知荆南河北盜起復以守真定韜單騎赴鎮招賊首夏
宏服罪奏以官縱其黨歸田里一路遂平金人謀南牧
韜陰治城守以待變是冬金兵長驅內嚮及還治梯衝
設圍示欲攻擊韜發強弩射之金人乃退自金兵之來
諸郡皆塞門民坐困韜獨縱樵牧如平日以時啟閉欽
宗善之拜資政殿學士時諸將救太原种師中姚古敗

以幹為宣撫副使太原陷以幹為宣撫使

按東都事略云拜幹河北

河東宣撫副使又云太原陷以幹為宣撫使蓋幹始為宣撫副使後又為宣撫使也宋史脫去為宣撫使事今

補召入覲為京師四壁守御使宰相沮罷之京城不守

始遣使金營金人命僕射韓正館之僧舍正曰國相知君今用君矣幹曰偷生以事二姓有死不為也正曰軍中議立異姓欲以君為正代得以家屬行與其徒死不若北去取富貴幹仰天大呼曰有是乎書片紙使親信持歸報諸子即沐浴更衣酌卮酒而縊建炎元年贈資

政殿大學士後謚忠顯

徐揆衢州人靖康元年以太學生試開封府進士為舉首未及大比而遭國難欽宗詣金營不歸揆帥諸生扣南薰門以書白守門者乞達二帥請車駕還闕二帥見書使以馬載揆至軍誥難揆厲聲抗論為所殺建炎二年追錄死節詔贈宣教郎而官其後

李若水字清卿洺州曲周人元名若冰上舍登第靖康元年累官太常博士

按東都事略云靖康初為太常博士宋史誤作靖康元年為太常博士

士今
改正

欽宗將遣使至金國議以賦入贖三鎮召若水賜
今名遷著作佐郎為使見尼堪于雲中終歸兵已南下
復假徽猷閣學士副馮澥以往甫次中牟守河兵相驚
以金兵至左右謀取間道去澥問何如若水曰戍卒畏
敵而潰奈何效之今正有死耳今敢言退者斬衆乃定
既行疊具奏言和議必不可諧宜申飭守備至懷州遇
館伴蕭慶挾與俱還及都門拘之于冲虛觀獨慶與澥
入既所議多不從尼堪急攻城乃使若水入見帝帝幸

金營成議而歸擢若水禮部尚書固辭改吏部侍郎金人再邀帝出郊若水扈從以行金人計中變逼帝易服若水抱持而哭憤詆金人金人曳出擊之敗面氣絕仆地衆皆散留鐵騎數十守視若水絕不食或勉之曰事無可為者公昨雖言國相無怒心今日順從明日富貴矣若水歎曰天無二日若水寧有二主哉後旬日尼堪召計事且問不肯立異姓狀若水曰上皇為生靈計罪已內禪主上仁孝慈儉未有過行豈宜輕議廢立尼堪

指宗朝失信若水曰若以失信為過汝其尤也尼堪令
擁去反顧罵不絕口監軍者搥破其脣嚙血罵愈甚至
以刃裂頸斷舌而死高宗即位特贈觀文殿學士謚忠
愍

吳革字義夫華州華陽人國初勲臣廷祚七世孫也少
好學喜譚兵再試禮部不中乃從涇原軍以秉義郎幹
辦經略司公事金人南牧使尼堪軍庭揖不拜責其貪
利敗約詞直氣勁尼堪少屈為追回威勝諸屯兵授書

使歸欽宗問割地與否利害對曰金人有吞噬之意願
悉起關中士馬赴都為備詔以為武功大夫閤門宣贊
舍人持節諭陝西行至朱僊聞金人圍京師復還與張
叔夜同入城請于帝乞幸秦州又乞出城劫之使不敢
近又乞諸門同出兵牽制衝突尾襲應援可一戰而勝
時衆言已入皆不果車駕幸金營革以為墮其計往請
叔夜欲身見其大帥計事又不果行上皇妃后太子出
郊革白孫傳乞留之不得乃與傳謀于啟聖僧院置振

濟局募士民就食陰以軍法部勒所合已至數萬多兩

河驍悍之士既而有立張邦昌之議革謀先誅范瓊輩

以三月八日起兵

按續通鑑時同謀者馬伸張所吳倫等又有內親事官數百人皆殺妻孥

焚所居共謀舉義傳未詳載附識于此

謀既定前期二日有班直甲士排

闥入言邦昌以七日受冊請急起事革乃披甲上馬至

咸豐門四面皆瓊黨給革入帳被執革罵之極口引頸

受害顏色不變其麾下百人皆死

滕茂實字秀穎杭州臨安人政和八年進士靖康元年

以工部員外郎假工部侍郎副路允迪出使為金人所留欽宗自離都城舊臣無敢候問起居者茂實聞欽宗將至即自為哀詞且篆宋工部侍郎滕茂實墓九字以授其友人欽宗及郊茂實具冠幘迎謁拜伏號泣金人迫令易服茂實力拒請從舊主俱行金人不許憂憤成疾卒雲中紹興二年贈龍圖閣直學士官其家三人

趙士跋濮王曾孫也靖康末為右監門衛大將軍吉州團練使金人驅宗室北行士跋間道遁之邢州結土豪

將舉事有告者金人執而殺之事聞贈保寧軍節度使

謚忠果

按士跋原附趙士隆傳後
今考係死于金析出另傳

欽定續通志卷五百十二

欽定四庫全書

欽定續通志卷五百十三

忠義傳

宋三

郝仲連 致厚

鄭驥

劉汲

唐重 郭忠孝
程迪

孫昭遠

呂由誠 傑
趙令佳

趙伯振

韓浩 朱庭傑
周中

王允功 王薦
周辛

郭贊

向子韶 新
子家

子襄

宋昌祚

鄭立
賽譽

胡廣

唐璟

通

楊粹中

杜績

龔揖

蔣子春

李政

郭澣

朱友恭

屈堅

趙叔憑

魏彥明

趙不試

叔皎

郭永

魏行可

郭元邁

王復

鄭褒
楊彭年

孫暉

徐徽言

適
孫昂

楊昭

丁元

崔縱

吳安國

林冲之

郁震
建

閻進

朱勳

趙令歲

王遠
劉卓

吳源

陳淬

仲敏

趙訓之

壘之
陳自仁

韋之
劉玠

楊邦乂

朱蹕 朱良方允武

唐琦

曾忘 悟

李彥仙 邵雲賈何

呂國登 宋炎趙成

鄭覃

薛慶

趙立

王琦

趙士醫

劉惟輔 高子孺韓青

劉泰

翟興 進亮

牛皓 高萬薛琪

任安 秦元張亨

王忠植

劉長孺

李壽

李靚

姚興

韋永壽 世堅

張玘 世雄

陳亨祖

王拱朱贊

彊霓震李仲康傑

李誠之

士允 秦鉅 秦浚 秦澤 阮希甫 趙汝標 甯時鳳 杜諤 嚴剛中

孫中

江士旺 陳興 曹全 邱卞 李斌

王迸吳從龍

劉宣

李亘孫安道

凌唐佐

僧真寶

郝仲連昌元人建炎元年金人略河中仲連時為貴州防禦使宣撫范致虛遣節制河東軍馬屯河中就權府事金將羅索以重兵壓城仲連力戰度不能守先自殺

其家人城陷不屈其子致厚

二字據通鑑增

亦遇害後贈中侍

大夫明州觀察使

鄭驥字潛翁信之玉山人登元符三年進士第知溧陽縣歲饑民亡漕司按籍督逋賦驥盡去其籍使者欲繩以法驥曰著令約二稅為定數今不除則逋愈多民愈貧賦愈不辦使者不能屈累官京兆府等路提舉常平高宗初以直秘閣知同州兼沿河安撫使時謀巡近甸金陵南陽長安為駐蹕計驥言南陽金陵偏方非興王

地長安四塞天府之國可以駐蹕會帝東幸揚州復請
自楚泗汴洛以迄陝華各募精兵首尾相應庶敵勢不
得衝決不報金將羅索薄同州及韓城驤遣兵拒險擊
之失利金人乘勝徑至城下通判以下皆遁去驤曰所
謂太守者守死而已翼日城陷赴井死贈通議大夫樞
密直學士諡威愍

劉汲字直夫眉州丹陵人紹聖四年進士累官開封府
推官宰相王黼初領應奉司汲對客輒詆之黼聞奏謫

監蓬州稅欽宗召赴闕時置京西轉運司於鄧州以汲
添差副使建炎元年金人再逼京師諸道不知朝廷動
息者三月及馮延緒傳詔撫諭謂車駕出郊定和議令
諸道罷兵汲謂副總管高公純曰此必金人脅朝廷以
款勤王之師爾可速進兵公純與俱至南陽不進汲獨
馳數十騎赴都城二帝已北行汲素服慟哭尋代公純
攝帥事捐金帛饗士為戰守計詔鄧州備巡幸汲廣城
池飾城闕以待加直龍圖閣知鄧州兼西京路安撫使

汲奏欲復兩河當先河東欲復河東當用陝兵於是金人復渡河謀知鄧州將為行在所命其將寧珠急攻京西汲遣副總管侯成林守南陽金人奄至殺成林汲集將吏謂曰吾受國恩金人來必死有能與吾俱死者乎皆流涕曰惟命乃下令曰城中有材武願從軍者聽留餘從便得敢死士四百人及南陽陷命將戚鼎將兵三千逆戰又命靳儀與趙宗印分出西南門持之汲自以牙兵登陴望見宗印從間道遁即自至鼎軍中麾其衆

陣以待敵俄而儀敗敵大至汲死之事聞贈大中大夫
諡忠介

唐重字聖任眉州彭山人大觀三年進士由蜀州司理
參軍知懷安軍金堂縣以薦授吏部員外郎歷左司郎
官起居舍人金人入京師重言開邊之禍起於童貫若
斬貫首尚可緩兵或獻議遠避重聞衛士語以告於朝
始定守城之計擢右諫議大夫累疏乞斬蔡京父子以
謝天下遷中書舍人未幾落職知同州金人已陷晉絳

將及同重慶不能守乃開門縱州人使出自以殘兵數
百守城示必死金人疑有備不復渡河而返二帝既北
行重即移檄川秦十路帥臣各備禮物往軍前迎奉未
及行而高宗即位長安謀帥乃以天章閣直學士知京
兆府尋兼府路經略制置使重前在同州凡三疏上大
元帥府乞蚤臨關中以符衆望暨至永興又六上疏皆
以車駕幸關中為請并條奏關中防河事宜皆不報金
將羅索渡河陷韓城縣時京兆餘兵悉調赴行在重遺

書轉運使李唐孺曰重平生自矢忠義不敢辭難始意
迎車駕入關居建旣之勢以臨東方今南幸矣關陝又
無重兵惟一死報國耳金兵圍城城中兵不滿千固守
踰旬而經制副使傅亮以精銳數百奪門出降城陷重
以親兵百人血戰諸將扶重去重曰死吾職也戰不已
衆潰中流矢死唐孺以其事聞詔贈資政殿學士後諡
恭愍郭忠孝字立之河南人簽書樞密院事達之子以
父任補右班殿直登進士第換文資授將作監主簿年

踰三十不忍去親側多仕於河南筦庫間宣和中為河東路提舉坐廢格鹽法免靖康初召為軍器少監入對以和議為非是力陳追擊之策帝命與宰相吳敏樞密李綱議忠孝復條十餘事上之主和者衆卒不用其策改永興軍路提點刑獄忠孝亟走關陝得勝兵三萬分隸十將擇一將統之繼遣兵趨澤潞聽宣撫司節制金人再逼京師永興帥范致虛率諸軍繇清澗入援忠孝曰金人深入而河東無守備願分兵走太行扼其歸路

彼必求戰城下之圍可緩致虛以為然檄河中守席益
馮翊守唐重與忠孝同出河東為牽制之舉大軍盡出
函谷忠孝獨以蒲解軍三千至猗氏遇金人破之踰絳
州破太平砦攻平陽入其郭會大軍失利滄澗乃引
還及金人逼永興忠孝與經略唐重分城而守金人陳
城下忠孝募人以神臂弓射之敵不得前已而攻陷城
東南隅忠孝與重及副總管楊宗閔轉運副使桑景詢
判官曾謂經略主管機宜文字王尚提舉軍馬武功大

夫程迪俱死之詔贈忠孝大中大夫子雍別有傳程迪
字惠老開封人父博古部郎延兵戰死永樂迪以門廕
得官宣和中從楊惟中征方臘有功加武功大夫榮州
團練使時諸使臣合薦迪忠義謀略可任將帥召赴行
在經略制置使唐重留迪為備金人已自同州渡河或
勸迪還蜀不從乃詣种氏諸豪謀率衆保險俟其勢稍
衰出奇擊之會前河東經制使傅亮建議當守不當避
重從之以亮為制置副使既而金兵益迫重乃以迪提

舉永興路軍馬措置民兵金人近城迪又欲選兵迎戰
使老稚得趣險以活亮執議城守金人四面急攻迪率
諸司及統制偏裨以下東鄉會盟誓不與敵俱生慷慨
嗚咽同盟皆感泣及城破乃自亮所分地始亮先出降
衆潰迪率其徒徇於衆曰敵讐我矣降死戰亦死努力
與鬪憤怒大呼口流血士皆感奮多所斬殺迪冒飛矢
持短兵接戰數十合身被創幾徧絕而復蘇猶厲聲叱
戰不已遂死之詔贈明州觀察使諡恭愍子昌諤

孫昭遠字顯叔其先眉州眉山人元祐間進士調長沙尉辟河東經畧司幹當公事歷鳳翔天興縣河北山東撫諭盜賊幹當公事尋擢河北燕山府路轉運使靖康元年召為水部員外郎洛陽陷西京留守王襄徙治襄漢授昭遠西道總管收潰卒且檄諸道使出師得兵十萬命馬祐昌統之祐昌與金人戰敗京師陷遣使至大元帥府建炎元年遷河南尹西京留守西道都總管至洛撫集散亡得義兵萬餘人柵伊陽使民入保其冬金

人來攻昭遠遣將姚慶拒戰軍敗慶死金兵益熾昭遠戰不利其下叛兵反擊昭遠遂遇害官屬無免者四年追贈徽猷閣待制

呂由誠字子明御史中丞諡之孝子以父恩補官調鄧州酒稅歷知合水來氏二縣通判成都府知雅嘉溫緜四州皆有治績靖康元年宰相唐恪薦由誠剛正有家法宜任臺臣召至京師與恪議不合力辭求退差知襲慶府金人再入京師康王移軍濟陽由誠竭力饋餉遣

官屬王允恭奉表勸進時京東諸郡兵驕多內訌獨由誠拊循有方士樂為用前後數被攻圍屹然自立救援皆絕孔彥舟以鄆兵叛攻郡累旬不能下始引去胡選者衆尤殘暴攻由誠示必取由誠夜焚其攻具直入帳下選衆駭散亦解去一日金兵四集由誠嚴立賞罰厲以忠義守兵爭奮金人百道攻城人無叛志判官趙令佳同心誓守城陷俱被執金人欲生降之不屈乃殺其子仍於前由誠不顧與令佳同遇害子僕與其家四十

口無生還者其孫紹清留蜀後自蜀走江浙訪由誠死節懇於朝詔贈由誠三官為通奉大夫與二子恩澤

趙伯振太祖八世孫宣和六年進士靖康末為鄭州司錄捍禦有功遷直秘閣通判州事建炎二年金人攻鄭州城陷伯振率兵巷戰中流矢墜馬遇害贈朝請大夫官其二子

韓浩丞相琦孫以奉直大夫守濰州建炎二年金人攻城浩率眾拒守城陷力戰死通判朱庭傑身被數箭亦

死權北海縣丞王允功司理參軍王薦皆全家陷沒浩
贈三官官其家三人庭傑允功薦各官其家一人朝議
大夫周中世居濰州率家人乘城助守中弟辛家最富
盡散其財以享戰士城陷中閭門百口皆死紹興六年
以周聿請贈官

郭贊汝陽縣丞也

續通鑑作知汝陽縣與此異

建炎二年金人陷蔡

州贊朝服詬叱不肯降遂見殺

向子韶字和卿開封人神宗后再從姪也登元符三年

進士第特恩改承事郎授荆南府節度判官累官至京東轉運副使知淮寧府建炎二年金人攻淮寧子韶率諸弟城守諭士民曰汝等墳墓之國吾與汝當死守金人晝夜攻城子韶親擐甲胄冒矢石遣其弟子率赴宗澤乞援未至城破子韶猶巷戰力屈為所執金人欲降之不可遂殺之其弟新知唐州子襄朝請郎子家等與闔門皆遇害惟一子鴻六歲得存事間贈通義大夫官其家六人後諡忠毅

宋昌祚和州鈐轄也建炎二年烏珠圍和州州人推昌祚權領軍事禁軍左指揮使鄭立亦拳勇忠憤并激士卒晝夜守備閱數日軍士胡廣發弩中烏珠左臂烏珠大怒飛砲雨集徑登弩發之地城立破入屠其城昌祚與權倖唐璟歷陽令蹇譽司戶徐兢縣尉邵元通及立廣皆死譙樓上軍士無降者事聞昌祚璟譽兢元通各贈官錄其子弟

楊粹中真定府人建炎二年知濮州金兵南下經其地

尼堪以濮小郡易之將官姚端乘其不意夜擣中軍尼堪跣足走僅以身免遂急攻城凡三十三日而陷端率死士突出尼堪入城以粹中歸不屈而死守禦官杜績亦死之贈粹中徽猷閣待制

龔楫字濟道兵部侍郎原之孫以業儒居鄉里建炎初間金人陷郡縣輒忿恚不食烏珠據和州築堡新塘楫率家僮襲之俘獲甚衆遇金兵大至取道圩上將歸於滁和鎮撫司金騎兵扼其衝不得前衆多赴水死楫麾

其衆曰今日鬪死亦足稱義士矣戰敗為金人所獲猶挺劍刺其一將罵不絕口金人憐割之金兵初至新塘有蔣子春者教授里中金人見其挾書又人物秀整喜之欲命以官子春怒罵乃殺之

李政為雲騎第六指揮在京東立戰功補官授河北將官冀州駐劄靖康二年

按高宗紀及北盟會編應作建炎二年

知州權邦

彥以兵赴元帥府勤王金兵來攻城政守禦有法紀律嚴明賞罰必信人皆用命俄而攻急有登城者焚其謀

樓政為所隔不得奔救大呼曰事急矣有能躍火而過者賞於是軍士十數人皆以濕纊裹身持仗躍火而過大呼力戰金人驚駭輒墜立厚賞之未幾政因傷而死城陷權知州事單某者不降自經死

郭潯德順中安堡人從軍積官至武經郎為涇原第八副將金人逼陝西渭帥以下叛降獨潯不肯帥忌之傳致以罪下之獄脅使俱降潯奮而呼曰大丈夫今得死所矣終不能身受污吾雖死誓不爾貸衆醜其語即殺

之建炎三年贈武翼大夫忠州刺史同死者朱友恭西
安人以忠翊郎為涇原第一副將部兵扞金人於華亭
數有功會金兵大集友恭赴敵力戰為所得渭帥既降
誘以甘言友恭更詆辱之帥不勝忿斷其脛以徇經日
乃斬之後贈敦武郎

屈堅為右武大夫忠州防禦使建炎二年金人圍陝府
堅引所部救之圍解而戰敗為金所執堅呼曰吾所以
來為解圍也城苟全吾死何憾金人殺之後贈三官錄

其家五人

趙叔憑建炎間任陝州都監累官武翼大夫就遷通守
金人圍陝州既久援兵不至城危時叔憑子官盧氏遺
以蠟丸書曰人臣當死國難況吾近屬可辱命耶遂死
之時通判王潁職官劉効陳思道馮經李岳杜開縣令
張玘將佐盧亭等五十一人俱死

按叔憑原附趙士蔭
傳今考係死於金析

出另
傳

魏彥明開封人通判延安府建炎二年金兵圍城彥明

與權府事劉選分地而守彥明當東壁空家貲以賞戰士金人晝夜攻城閱十有三日而陷彥明坐子城樓上金人執之使速降不屈殺之詔贈中大夫官一子

趙不試太宗六世孫宣和末通判相州建炎元年知州事初汪伯彥既去相金人執其子似遣來割地似至相不試固守不下明年金人大入州久被圍軍民無固志不試謂之曰我宗子也義不降計將安出衆不應不試登城與金人約勿殺百姓許之既啟門盡納其家井中

然後以身赴井囑提轄官實以土州人皆免於死叔皎
秦悼王四世孫元豐中為右班殿直累遷至德州兵馬
都監建炎二年金人圍城叔皎率兵前後六戰圍急有
江詰者謀以城降斬以徇金人登城叔皎猶力戰勢窮
被執怒罵不屈遂遇害

按叔皎原附趙士隆傳後
今考係死於金析出另傳

郭永大名府元城人以祖仕為丹州司法參軍累官通
判鄭州燕山兵起以永為其路轉運判官郭藥師屯邊
怙恩暴甚與民市不償其直復毆之至壞目折支乃已

安撫使王安中莫敢問永見藥師曰前日將軍杖策歸朝廷禮遇無所不至將軍未有以報乃縱部曲戕民乎藥師雖謝無媿容永謂安中曰他日亂邊者必此人也已而安中罷永亦辭去移河北西路提舉常平會金人趨京師所過城邑欲立取之是時天寒城池皆凍金率藉冰梯城不攻而入永適在大名間之先弛濠漁之禁人爭出漁冰不能合金人至睥睨久之而去還河東提點刑獄時高宗在揚州命宗澤守京師澤將復兩河以

大名當衝要檄永與帥杜充漕張益謙相倚角永朝夕
謀戰守具因結東平權邦彥為援不數日聲振河朔已
沒州縣皆復應官軍居亡何澤卒充守京師以張益謙
代帥而裴億為轉運使益謙億齟齬小人會范瓊脅邦
彥南去劉豫自濟南來寇大名孤城無援永募士齎帛
書夜縋城出告急朝廷乞先為備攻圍益急以東平
濟南俘大呼城下曰二郡已降益謙輩相顧色動永大
言曰今日正吾儕報國之時又行城撫將士曰王師至

矣吾城堅完可守汝曹努力也衆感泣城陷益謙億率衆迎降金人曰城破始降邪衆以永不從為辭金人遣騎召永永正衣冠南面再拜訖易幅巾而入尼堪曰沮降者誰永熟視曰不降者我金人素聞永名且奇其狀貌欲啗以富貴永瞋目唾曰恨不殺身以成仁何富貴之云尼堪麾使去則曰願速死亟驅屬鬼以報金人怒遂殺之一家皆遇害紹興初贈中大夫資政殿學士諡勇節官其族數人

魏行可建州建安人建炎二年以太學生應募奉使補
右奉議郎假朝奉大夫尚書禮部侍郎充河北金人軍
前通問使仍命兼河北京畿撫諭使行可渡河見金人
於澶淵因留不遣行可嘗貽書金人誓以不戢自焚之
禍若亟以中原還趙氏賢於奉劉氏萬萬也紹興六年
卒十三年張邵來歸言於朝贈朝奉郎秘閣修撰官其
子孫行可之使也吳人郭元邁以上舍應募補右武大
夫和州團練使為之副亦卒於北焉

王復以龍圖閣待制知徐州建炎三年金人來攻復與男倚同守城率軍民力戰外援不至城陷復堅坐聽事尼堪欲降之復嫚罵求死闔門百口皆被害教授鄭褒巡檢楊彭年亦死焉事聞贈復資政殿學士諡壯節官其家五人

孫暉為泗州招信縣尉建炎三年正月金人陷泗州由招信將渡淮暉將射士民兵禦之沈其舟城破死於敕書樓

徐徽言字彥猷衢之西安人少為諸生負氣有志力大
觀二年詔求材武士韓忠彥范純粹劉仲武以徽言薦
平陽府軍馬鈐轄權知保德軍改總領西河軍馬以討
西夏功累遷兼議郎改知火山軍兼統制河西軍馬徙
赴石州靖康初遷武翼郎閤門宣贊舍人金人圍太原
徽言以三十人渡河一戰破之遷武經郎知晉寧軍兼
嵐石路沿邊安撫使金人再逼京師陝西制置使范致
虛檄徽言守河西時割兩河以講和同知樞密院事聶

昌出河東為金人所劫以便宜割河西三州隸西夏晉
寧軍民大恐徽言曰此使人矯詔耳三郡在河西設有
詔猶當執奏況無之耶遂率兵復取三州又并取嵐石
等州金遣守領為九州都統與晉寧對壘徽言出奇兵
襲逐之陰結汾晉土豪數十萬約復故地則奏官為守
長聽世襲且曰定全晉則形勝為我有中原當指期克
復金人忌徽言欲速拔晉寧以除患建炎二年冬自蒲
津涉河圍之徽言出兵縱擊斬羅索貝勒之子當是時

環東河皆已陷獨晉寧屹然孤墉橫當強敵徽言撫摩
疲傷與金人鏖河上大小數十戰所俘殺過當與諸將
畫隅分守自致死力金人進攻數敗圍之益急徽言自度
不支遣人間道馳書其兄昌言曰徽言死矣凡其勉事
君一夕裨校李位石斌繫帛書飛寄上陰約羅索啟外
郭納之徽言與太原路兵馬都監孫昂決戰鬥中退嬰
牙城以守置妻子室中積薪焚之仗劍慷慨語將士我
天子守土臣義不見辱乃自裁左右號救持之急金兵

粹至挾徽言以去羅索誘之降不從舉戟向之披杜迎
刀意氣自若金人知其終不可屈遂射殺之初徽言與
劉光世束髮雅故光世被命援太原次吳堡津頓兵不
進徽言移書趣行諭以太原危不守且暮望救光世猶
前卻徽言即露章劾其逗撓封副與之光世惶遽引道
宣撫使張浚與諸使者相繼以徽言死節事聞詔贈晉
州觀察使謚忠壯再贈彰化軍節度孫昂亦不屈死贈
成忠郎團練使徽言子岡既同死事而從孫適亦以守

安豐死昂即孫益之子各世著忠義云

楊照者濠州將官也金人圍城蟻附而登照躍上角樓刺賊之執黑旗者死照俄中流矢卒有統領丁元者遇金人十八里洲被圍元大呼曰毋負國一舟二百人皆鬪死詔贈承信郎錄其後

崔縱字元矩撫州臨川人登政和五年進士第累遷承議郎幹辦審計司建炎三年高宗將遣使通問二帝廷臣以前使者相繼受繫莫肯往縱毅然請行乃授朝請

大夫右文殿修撰試工部尚書以往比至首以大義責金人請還二帝又三遺之書金人怒徙之窮荒久之金人許南使自陳聽還縱以王事未畢不忍言竟握節以死洪皓張邵還始歸縱骨詔以兄子延年為後有吳安國者以太常少卿使金金人拘留脅服之安國毅然曰我首可斷我節不可奪金人不敢犯乃遣還

林冲之字和叔興化軍莆田人元符三年進士歷都官金部郎出守臨江南康靖康初召為主客郎中金兵再

至詔副中書侍郎陳過庭使金同被拘執冲之奮厲見
於詞色金人怒徙之奉聖州既二年金逼冲之仕偽齊
不屈徙上京又不屈置顯州極北沍寒之地幽佛寺十
餘年病亟語同難者曰某年七十二持忠入地無恨恨
國讐未復耳南向一慟而絕洪皓還朝以聞詔與二子
官子郁從子震霆郁字襲休宣和三年進士再調福建
茶司幹官建州勤王卒還以不得卸甲錢為亂郁聞變
出諭之遇害震字時專登進士第仕至秘書少監以不

附二蔡有聲崇寧大觀間寔字時隱登進士博學深象

數與鄭樵為石交

據鄭樵傳後移入

為敕令所刪定官力詆紿

興和議挂冠出都門權臣大恚怒放廢以死莆田人稱
為忠義林氏

閻進隸宣武為軍官建炎初遣使通問進從行既至雲

中府金人拘留使者散處之進亡去追還留守高慶裔

問何為亡進曰思大宋爾又問郎主待汝有恩汝亡何

故進曰錦衣玉食亦不戀也慶裔義而釋之凡三亡乃

見殺臨刑南向受刃曰我皇帝行在也行刑者曳其臂
令面北進踊身直起盤旋數四卒南嚮就死進武校尉
朱勣亦以從使被留不半月亡去追還杖死梃下

趙令歲燕懿王元孫安定郡王令衿兄也初名令禪建
炎初以鄂州通守領兵戍武昌渡江存撫黃人李綱言
於帝擢直龍圖閣知黃州賜今名賊張遇過城下招令
歲度不能拒出城見之遇飲以酒一舉而盡曰固知飲
此必死願勿殺軍民遇驚曰先以此試公耳更取毒酒

沃地地裂有聲引軍去未幾丁進李成兵送至俱擊却之叛將孔彥舟引兵圍城固率民兵守凡六日乃解三年金人聞孟太后在南昌欲邀之徑犯黃州力攻城陷執令歲欲降之大罵不屈而死事聞贈徽猷閣待制諡愍忠其從官都監王遠判官吳源巡檢劉卓皆以不屈死焉

陳淬字君銳興化軍莆田人紹聖初下第挾策西遊時呂惠卿帥廊延淬戎服往見惠卿器之補三班奉職與

西人接戰於烏原手殺十餘人擒其砦主奏為左班殿
直廊延路兵馬都監累遷武經郎宣和四年授真定路
分都監兼知比砦河北第一將尋拜忠州團練使真定
府路馬步副總管七年金人入真定淬以孤軍禦之妻
子皆死建炎元年辟諸軍統制宗澤命擊金人於南華
敗之兼大名府路都總管兵馬鈐轄擢知恩州金王善
擁兵襲恩淬與長子仲剛拒戰敗飛刃及淬仲剛以身
蔽刃死之明年善復圍陳州淬大敗善兵拜宿州安撫

使李成叛詔以淬為御營使六軍都統淮南招撫使討之三戰三捷未幾金人薄采石又檄淬回援建康淬白杜充欲伏兵掩獲之充不從金兵遂薄板橋諸軍皆潰淬獨與戰勢窮力盡據繩牀大罵刃交於胸而色不動與其從子仲敏俱死詔贈拱衛大夫明州觀察使官其子瑁

趙訓之字誨道秦悼王五世孫登政和二年進士調東平儀曹知平江府吳縣忤朱勔移疾去未幾金人陷京

師訓之居揚州率大姓募士勤王建炎三年知吉州永豐縣孟太后避虔州護衛統制杜彥與其麾下叛後軍楊世雄應之將犯永豐訓之與尉陳自仁簡兵分為二一取間道繞賊後一據地利匿其精兵以誘賊賊至伏發殲其衆會賊別校倉卒繼至訓之率數十輩拒戰與自仁俱被害事聞詔贈訓之朝散郎直秘閣諡忠果自仁通直郎太后之發吉州也至太和衆潰從事郎三省樞密院幹辦官劉德老為金騎所殺金人過江上元

丞趙壘之帥鄉兵迎敵死之贈奉議郎聿之安定郡王叔東子也建炎中為成忠郎金人圍潭州聿之隸東壁守帥臣向子諲循城顧聿之曰君宗室不可效他人苟簡聿之感慨流涕金兵登城縱火子諲率官吏突門遁去城陷聿之巷戰大罵而死將官武經郎劉玠亦死之事聞贈聿之左監門衛大將軍玠武經大夫皆官其家

按訓之等諸人原附趙士隆傳後今考訓之等從孟太后死於叛卒壘之等死於金析出另傳

楊邦乂字晞稷吉州吉水人以舍選登進士第歷婺源

尉晉知漂陽縣會叛卒周德據府城殺官吏邦入立縣
獄死囚趙明於庭諭之曰爾悉里中豪傑誠能集爾徒
誅賊不惟有罪當上功畀爾爵明即請行邦入飲之酒
使去越翼日賊平建炎三年金人薄建康城時李枕以
戶部尚書董軍餉陳邦先以顯謨閣直學士守建康具
降狀逆之十里亭金帥完顏宗弼既入城枕邦先率官
屬迎拜惟邦先不屈膝翼日宗弼等與枕邦先宴堂上
立邦先於庭邦先叱枕邦先曰天子以若扞城敵至不

能抗更與共宴樂尚有面目見我乎尋遇害事聞贈直
秘閣諡忠襄官其四子紹興七年加贈徽猷閣待制

朱蹕湖州安吉人知錢塘縣建炎三年金人逼杭州蹕
率弓手土軍前路拒敵兩中流矢左右掖至天竺山猶
率鄉兵力戰後數日遇害朱良者字良伯吳郡人建炎
中為海鹽縣尉金兵入境良披甲執戈集所部百餘人
奮擊金兵眾為披靡力不敵而死事聞官其子思後守
漢陽方允武者衢州人為常州宜興巡檢建炎三年金

人入縣之金泉鄉允武率土軍鄉民迎敵遇金兵梅嶺村力戰而死詔贈兩官官其家二人

唐琦本衛士建炎間高宗航海琦病留越州李鄴以城降金帥巴拜據之琦袖石伏道旁伺其出擊之不中被執巴拜詰之琦曰欲碎爾首死為趙氏鬼耳巴拜曰使人人如此趙氏豈至是哉又問曰李鄴為帥尚降汝何人敢爾琦曰鄴為臣不忠吾恨不得手刃之乃顧鄴曰我月給纔石五斗米不肯背主爾乃若此豈復齒人類

哉詬罵不少屈已拜趣殺之至死不絕口

曾志字仲常中書舍人鞏之孫補太學內舍生累官司
農丞通判温州須次於越建炎三年金人陷越以已拜
為帥約詰旦城中文武官並詣府不至者死志獨不往
為鄰人糾察捕見已拜辭氣不屈與家屬四十口同日
遇害事聞予三資官其弟恂子密兄子寔皆將仕郎方
被難時密甫四歲與乳母張俱死夜值小雨張得蘇頌
見密亦蘇尚吮其乳郡卒陳海匿以歸後仕至知南安

軍志從弟悟字蒙伯翰林學士肇之孫也宣和二年進士靖康間為亳州士曹金人破亳州悟被執慢罵衆刃剗之死體無存者妻孥同日被害

李彥仙字少嚴初名孝忠寧州彭原人徙鞏州嘗為种師中部曲入雲中獲首級補校尉靖康元年金人圍汴郡縣募兵勤王遂率士應募補承節郎因言事亡去易名彥仙以效用從河東軍謀金人還復補校尉河東陷彥仙至陝以兵事見守臣李彌大彌大壯其材留為裨

將金人再入汴彥仙為石壕尉堅守三觜民爭依之金人攻三觜彥仙戰佯北金人追之伏發掩殺三千計分兵四出下五十餘壁初金人得陝用降者守之使招集散亡彥仙陰遣士廁其間金人不覺乃引兵攻其南郭夜潛師薄東北隅所納士內應譟而入復陝州乘勝渡河列柵中條諸山旁郡邑皆響附事聞即命知陝州兼安撫使遷武節郎閤門宣贊舍人彥仙蒐軍實增陴濬湟盡取家屬以來曰吾以家徇國與城俱存亡間者感

服邵興在神稷山以其衆來願受節制彥仙辟興統領
河北忠義軍馬屯三門後賴其力復虢州屢敗金兵詔
授彥仙右武大夫寧州觀察使兼同虢州制置羅索率
叛將折可求衆號十萬來攻分其軍為十以正月旦為
始日輪一軍攻城復聚十萬軍併攻期以三旬必拔彥
仙意氣如平常登譙樓大作技樂潛使人縋而出焚其
攻具食盡煮豆以啗軍卒而取汁自飲至是亦盡告急
於宣撫使張浚浚檄都統制曲端將涇原兵來援端素

疾彥仙出已上無出兵意浚幕官謝昇言於浚曰金旦暮下陝則全據大河且窺蜀矣浚乃出師至長安道阻不得進彥仙曰與金人戰將士未嘗解甲羅索雅奇彥仙才嘗啗以河南兵馬元帥彥仙斬其使至是使人呼曰即降昇前秩彥仙曰吾寧為宋鬼安用汝富貴為發弩斃之金益兵急攻城陷彥仙率眾巷戰矢集身如蝟左臂中刃不斷戰愈力金人惜其才以重賞募生致之彥仙易敝衣走渡河曰吾不可以身受敵人之刃既而

聞金人縱兵屠掠曰金人所以甘心此城者以我堅守
故也我何面目復生乎遂投河死裨將邵雲呂圓登宋
炎賈何闔平趙成皆死浚承制贈彥仙彰武軍節度使
官其子後諡忠威邵雲龍門人金人陷蒲城雲聚少年
數百壁山谷時出撓之會邵隆起兵雲往約為兄弟彥
仙在陝遣客說以義遂來歸累有功官至武翼郎闔門
宣贊舍人城破被執雲大罵不屈羅索怒釘雲五日而
磔之呂圓登夏縣人嘗為僧後應募捍金人殺澠間彥

仙保三箭圓登歸之功最多為愛將城垂破以兵來援
身重創方卧聞城陷遽起戰死宋炎陝縣人以善射補
秉義郎金人圍城炎以勁弩數百發毒矢殺千餘人城
陷力戰死並贈官錄其家

鄭覃字季厚明州人靖康二年貢於鄉建炎四年春金
人陷明州覃挈族避難山谷間金人追及與兄章俱被
執脅以刃曰與吾金貫汝覃號泣指所瘞金釵與之遂
見釋而金兵相屬覃挈小舟與其妻董同載去顧謂章

曰萬一不得脫覃豈北面異國者兄勉承祭祀既復為
兵所劫迫之降覃厲罵不屈躍入水中董哭曰夫亡矣
亦自沈

薛慶起羣盜據高郵張浚親往招之慶感服因使守高
郵尋遷拱衛大夫福州觀察使承州天長保寧鎮撫使
金人還自浙屯天長六合間將由運河引舟北歸而趙
立在楚慶在承扼不得進烏珠欲會兵攻楚州真揚鎮
撫郭仲威聞之約慶俱往迎敵慶至揚州仲威置酒高

會慶怒曰此豈縱酒時耶我為先鋒汝當繼後上馬疾馳去平旦出揚州西門從騎不滿百轉戰十餘里亡騎三人仲威迄不至慶與其下奔揚州仲威閉門拒之慶倉皇墜馬為金追騎所獲金人殺慶承州陷計聞贈保寧軍承宣使官其家十人

趙立徐州張益村人以勇敢隸兵籍靖康初金人大入立數有戰功為武衛都虞候建炎三年金人攻徐知州事王復拒守命立督戰中六矢戰益厲城陷復死立巷

戰奪門以出金人擊之死夜半得微雨而蘇乃殺守者
入城求復屍慟哭手瘞之陰結鄉民為收復計金人北
還立率殘兵邀擊斷其歸路奪舟船金帛以千計軍聲
復振遂復徐州詔授思翊郎權知州事累遷右武大夫
忠州刺史會金左將軍昌圍楚州急宣撫使杜充命立
將所部兵往赴之且戰且行連七戰勝而後達楚兩頗
中流矢不能言以手指麾既入城休士而後拔鏃詔以
立守楚州明年正月金人攻城立命撤廢屋城下然火

池壯士持長矛以待金人登城鉤取投火中金人選死
士突入又搏殺之乃稍引退五月烏珠北歸以輜重假
道於楚立斬其使烏珠怒乃設南北兩屯絕楚餉道立
出戰大破之會朝廷分鎮以立為徐州觀察使泗州漣
水軍鎮撫使兼知楚州立一日擁六騎出城呼曰我鎮
撫也可來接戰有兩騎將襲其背立奮二矛刺之俱墜
地奪兩馬而還衆數十追其後立瞋目大呼人馬辟易
明日金人列三隊邀戰立為三陣應之金人以鐵騎數

百橫分其陣而圍之立奮身突圍持挺左右擊大呼潰
而出城始受圍菽麥野生澤有鳧茨可采後皆盡至屑
榆皮食之金人圍益急九月攻東城立募壯士焚其梯
火輒反嚮立歎曰天乎風轉焚一梯立喜登磴道以觀
飛砲中其首而絕金人疑立詐死不敢動越旬餘城始
陷事聞贈奉國節度使開府儀同三司官其子孫十人
諡忠烈

王琦為弓門砦巡檢建炎四年金人還自熙河琦禦之

金人立招降旗榜衆皆拜琦獨不屈金人殺之

趙士醫宗室子任秀州兵馬都監建炎四年烏珠入州

士醫乘城拒戰城陷死之後贈武翼大夫官其二子

傳士

醫原附趙士隆傳今考
係死於金析出另傳

劉惟輔涇州人以同州觀察使為熙河馬步軍副總管

金人既得秦州經略使張深遣惟輔將三千騎禦之金

前軍踰鞏州惟輔留軍熟羊城以千八百騎夜趨新店

黎明軍進惟輔舞稍刺其先鋒將貝勒和斐彥洞曾墮

馬死敵為奪氣退去深檄隴右都護張嚴往追之惟輔不欲聽嚴節制自別道由吾山出寶雞嚴追及金人於五里坡遇伏死之惟輔自石鼻砦遁歸金人略熙河追及所部皆走其親信軍詣金人降金人執惟輔誘之不言金人怒捽以出惟輔奮首曰斬即斬吾頭豈汝捽也即閉口不復言而死張浚聞之承制贈昭化軍節度使官子孫十二人時有高子孺者狄道人知蘭州龔谷砦聞惟輔尚存固守以待及城陷先刃其家而後死韓青

為熙河馬步軍第六將間行從惟輔為金人所擒亦罵
不絕口而死

劉泰樞密院忠義前軍正將也以私財募兵三百糧儲
器械一切不資於官金人逼壽春泰率所部赴援轉戰
累日身被數十創死詔贈武翼郎官其家三人

翟興字公祥河南伊陽人劇賊王仲起興與弟進應募
擊賊金人入京師以保護陵寢功補承信郎辟京西北
路兵馬副鈐轄為陝西宣撫司前軍統制會進為叛將

楊進所害賊來勢擊敗官軍興率餘衆拒賊保伊川明年愬進死事於朝以興代進為京西北路安撫制置使兼京西北路招討使兼知河南府楊進屯鳴臯山北興與子琮帥鄉兵時出擾之進棄輜重南走興邀擊於魯山縣進中流矢死衆潰西京平賊王俊據汝州興引兵攻之俊棄城保徽蓋山興進攻免胄大呼曰賊識我乎我翟總管也衆皆披靡遂破之金人逼河陽鞏縣永安軍興遣子琮與搏戰屢捷詔授河南孟汝唐州鎮撫使

兼知河南府轉武略大夫兼閤門宣贊舍人寓治伊陽
時河東北雖陷土豪聚衆保險興遣蠟書結約之皆願
受節制高宗嘉之授河東北路軍馬使金人入陝右興
遣子琮生擒金河東都統巴古遂復陽城縣來勝取絳
之垣曲進至米糧川紹興元年春金重兵侵河南時興
軍乏糧人情震恐興授將彭玘方略設伏於井首金將
就擒進武功大夫忠州團練使劉豫將遷汴以興屯伊
陽憚之遣蔣頤持書誘興以王爵興斬頤焚其書豫計

不行乃陰遣人啗裨將楊偉以利偉殺興攜其首奔豫
事聞贈保信軍節度使子琮繼興為鎮撫使琳閣門祇
候弟進字先之以捕盜勞補下班殿侍累功充京西第
一將時與金人約收燕山故地改河北第四將往至遂
城會契丹兵奄至都統制劉延慶以進為先鋒戰幽州
石料岡盧溝河皆捷金人逼京師西道總管王襄欲引
兵而南進諫止之因遣進分軍而西時經略使范致虛
已合五路軍馬次潼關以進統河南民兵收復西京進

至福昌遣兵襲金營擒其遊騎金人逼靈山砦進父子
兄弟與之戰潰圍至高都集鄉兵七百人夜行晝伏五
日至洛城夜半破關入擒高世由再捷於伊陽白草塢
都總管孫昭遠至洛陽以進戍澠池界授武義大夫閤
門宣贊舍人未幾洛陽再陷進在伊陽裒散亡纔千人
戰於驢道堰生擒金將翟海追至梅花谷羣盜冀德韓
清嘯聚南陽進間道擊之德降繼斬清於艾蒿平勒兵
抵龍門屢與金人在夾河戰乘勝入洛陽金人聚懷衛

蒲孟數州之衆薄城下斧諸門入進率士卒巷戰次子

亮死之

按高宗紀建炎二年四月進以兵襲烏珠於河南兵敗其子亮死之與此互異

遷武功

大夫閤門宣贊舍人充京西北路兵馬都鈐轄尋授馬

步軍副總管升本路制置使兼知河南府會巨寇楊進

擁兵數萬殘害汝洛間進謂其兄興欲力除之楊進遣

數百騎絕水犯進營進乘半渡擊之破賊四砦馬驚墜

塹為賊所害贈左武大夫中州刺史官其後五人

牛皓福州人為武功大夫川陝宣撫後軍中部將紹

興五年金右都監薩里罕與其熙河經略使慕洵欲下秦川宣撫副使吳玠遣諸校分道伺之皓至瓦吾谷與金將華善遇力戰死有承信郎高萬且罵且戰與熙河路部將任安宣撫司隊官秦元薛琪張亨皆死於陣後皓安皆贈翊衛大夫官其家五人萬等贈三官錄其子王忠植太行義士也紹興九年取石州等十一郡授武功大夫知代州累官河東經略安撫使金人圍慶陽急忠植以所部赴陝西行次延安叛將趙惟清執忠植械

送右副元帥薩里罕不屈使甲士引詣慶陽城下誘降
忠植呼曰我河東步佛山忠義人也為金所執使來招
降願將士勿負朝廷堅守城壁薩里罕怒詰之忠植披
襟大呼曰當速殺我遂遇害事聞贈奉國軍節度使開
府儀同三司官其家十人

劉長孺耀州人簽書博州判官廳公事與劉豫書備陳
祖宗德澤勸以轉禍為福豫怒囚之百日終不屈復官
之不從紹興九年宣諭使周聿上之朝詔赴行在以老

病轉兩官奉祠其後金復渝盟長孺知華陰縣不屈而死

李嘉開封人宣和六年進士建炎中知彭陽縣金兵至與民移治境上或執之以獻金人欲官之凡三辭其後金人以為歸附命為儒林郎嘉言於所司曰昔為俘獲不敢受歸附之賞還其牒劉麟聞其賢命張中孚以禮招致嘉力拒之紹興九年死原州事聞贈奉議郎官其家一人

按劉長孺李嘉二傳附劉化源傳後今化源移入獨行析出另傳

李靚字彥和吉州龍泉人走淮南以策干都督張浚浚奇之使隸淮西總督孫暉戲下累功授承信郎紹興十年金遣其將翟將軍犯境靚與部曲當其鋒轉戰俘翟將軍乘勝逐北會兵大至遂死之

姚興相州人靖康中以州校劫殺金人有功借補承信郎建炎初張琪聚兵歸東京留守宗澤興往從之又從琪依劉洪道於池州紹興元年琪叛執總管巨師古將殺之興密諭所部挾而馳夜歸呂頤浩頤浩義之請於

朝授武義郎隸張俊軍中復從劉錡守順昌遷武略大夫戰淮壩有功授右武大夫累遷建康府駐劄御前破敵軍統制充荆湖南路兵馬副都監紹興三十一年興隸都統王權麾下初金主亮在壽春江淮制置副使劉錡命權將兵迎敵督戰甚急權怯懦不進不得已守廬州及金兵渡淮權遣興拒之遇於尉子橋金人以鐵騎進興麾兵力戰手殺數百人權奔仙宗山嚴兵自衛興告急數不應有李二者嘗有私恩於權因得出入軍中

往來兩界貿易間竊權旗幟遺金人至是金人立權旗
幟以誤興興往奔之父子俱死事聞詔贈容州觀察使
開禧元年賜諡忠毅

韋永壽者紹興三十二年以統制官與金人戰和州子
承節郎世堅救之同死贈中衛大夫融州觀察使世堅
贈三官

張玘字伯玉世居河南澠池建炎中以家財募兵千人
翟興制置京西玘以衆屬焉積功補武翼大夫成州刺

史董先為制置司前軍統制玘佐之紹興元年金將高
瓊率眾取商州董先禦之玘乘銳奔擊九戰九捷明年
春偕先繇藍田渡渭規取長安玘陳兵華嚴川時劉豫
據京師先軍乏食偽降密書報玘述必還意王倚攝虢
州從偽意堅與別將董震謀害玘震陰以告玘翼日倚
詣玘議事玘責以大義斬之先是豫遣人招玘為商虢
順州路兵馬都監同統制軍馬玘因其使至是并戮之
於是偽齊河南安撫孟邦雄總管樊彥直據洛陽兵抵

長水玘遣將設伏與戰而勝率精騎三千一日夜馳三百里黎明至河南邦雄就擒彥直遁去便宜升霸州防禦使三年春先自偽齊歸玘還兵柄退就位時人義之翟琮言於朝真授玘武翼大夫果州團練使河南府孟汝唐州馬步軍副總管未幾詔先一行並聽神武後軍統制玘從岳飛復京西六州累功進拱衛大夫入侍衛三十二年領御營宿衛前軍都統屯泗州時金人攻海州急玘赴救戰於州北三里殺獲萬計海州圍解玘中

流矢卒贈正任觀察使官其後九人孝宗即位加贈清遠軍承宣使子世雄歿於符離之戰贈武節大夫

陳亨祖者淮寧大豪也紹興末官軍復蔡州亨祖領民兵據淮寧執金知州完顏頁嚕以其城來歸命為武翼大夫忠州刺史知淮寧府金兵攻城亨祖力戰死之舉家五十餘人皆歿贈容州觀察使

王拱建康府前軍統制從都統邵宏淵收復虹縣進取宿州屢有功隆興元年五月與金人接戰深入營中自

辰至申力戰死詔贈正任觀察使官其家八人是役也
中亮大夫朱贊亦死之贈承宣使

彊霓自金歸宋為武功大夫閤門宣贊舍人知環州環
慶路統制軍馬兼沿邊安撫使隆興間金兵圍環州與
其弟武經大夫環慶路統領沿邊忠義軍馬名震者堅
守孤城招誘使降不屈城陷死焉並贈觀察使康傑者
權知扶風縣與金將馮宣戰宣欲招之傑奮曰吾當死
於陣不能降敵宣殺之李伸者知天興縣堅守不下城

陷自殺

李誠之字茂欽婺州東陽人慶元初釋褐為饒州教授擢國子學錄以言罷起為江西轉運使幹辦改通判常州知郢州移知蘄州益城壁備樓櫓築軍馬牆教閱廂禁民兵激之以賞積粟四萬嘉定十四年二月金人攻淮南誠之喟然謂其僚曰吾以書生再任邊壘行年七十獨欠一死爾乃募死士迎擊過於橫槎橋大破之居數日金人臨沙河欲渡又破之明日金兵大至決湟水

焚戰樓又拒退之明日金移兵為必渡計斡兵直前奮
擊殺其帥未幾金兵傅城遂燔木柵誠之出禦之又殺
其將卒數十人奪所佩印三月朔金人攻西門射卻之
俄造望樓以窺城誠之為疑兵以示之又使持書來脅
降誠之戮之而還其書越二日金人以攻具進誠之設
械禦之夜出擣其營會黃州失守金併兵為一凡十餘
萬援兵不至誠之激厲將士勉以忠義城陷于士允力
戰死誠之引劍將自剄呼其孥曰城已破汝等無辱妻

許氏及婦若孫皆赴水死事聞贈朝散大夫秘閣修撰
封正節侯士允通直郎從誠之死者通判州事秦鉅字
子野丞相檜曾孫城破鉅與誠之各以自隨之兵巷戰
死傷略盡鉅還署令火諸倉庫乃赴一室自焚死次子
浚與弟澤從父俱死特贈鉅五官秘閣修撰封義烈侯
贈浚澤通直郎州縣教授阮希甫贈通直郎防禦判官
趙汝標蘄春主簿甯時鳳錄事參軍兼司戶杜諤俱贈
承務郎兼蘄州都大監轄蘄州鎮倉庫嚴剛中贈承事

郎時統制官孫中小將江士旺陳興曹全印卞軍士李
斌等皆鬪死司理參軍趙興裕先率民兵百餘人奪關
出外求援僅以身免而全家十六人皆歿淳祐十二年
特封鉅義烈顯節侯黃州之陷守臣何大節亦投江死
焉

王迸字純父饒州樂平人鄉舉恩免為固始簿攝邑紹
定中金兵逼淮守令望風遁迸懷印自投於井死吳從
龍字子雲官至武功郎建康府統制紹定兵難為先鋒

被擒使至秦州城下誘降不屈死之官其弟從虎至武經大夫

劉宣為秦鳳路兵馬都監金人入關陝宣遺蠟書密與吳玠相結且率金將任拱等歸朝約日已定有告之者金人取宣縷臂之

李亘字可大兗州乾封人太觀二年進士建炎末金人克淮南亘不及避劉豫使守大名與唐浚佐謀密陳豫可取狀事洩亘坐死又有孫安道者為應天府兵馬鈐

轄城陷不得歸謀挺身還朝為人所告而死

凌唐佐字公弼徽州休寧人元符三年進士建炎間知
南京城陷劉豫因使為守與宋汝為密疏其虛實遣人
告於朝事泄豫捕唐佐斬之境上

按劉宣以下四人並
因反正被害今次其

行事附於
忠義之末

僧真寶代州人為五臺山僧靖康之擾與其徒習武事
於山中欽宗召對便殿眷賚甚厚真寶還山益聚兵戰
守敵衆大至晝夜拒之力不支寺舍盡焚被執不屈郡

守劉駒諤勸百方真實曰吾法中有口回之罪吾許宋
皇帝以死豈當妄言也怡然受戮聞見者嘆異焉



欽定續通志卷五百十三